

TEZAUUR LITURGIC

13 OCTOMBRIE

**ACATISTUL
SF. MUCENIȚE
ZLATA/HRISIA
DE LA
MEGLENA
BULGARIEI**



MOSCOVA, 2000



Акафист

СВЯТОЙ ВЕЛИКОМУЧЕНИЦЕ

Злате Мегленской

Кондак 1

Избранная служительнице Бога воплощенного и чистая хранительнице девства нерастленного, родителей своих Христа ради отрекшуся и крове исповедницы порфирию облекшуся, в лик празднственный ныне ты вси чтущии сошедшеся любовью поем, о Злато, Церкви позлащение: но яко непорочная невеста Слова Божия и велие ко Господу имущи дерзновение, о нас, всеокаянных, молися неотступно, да мира многострастного океан преплывше, сподобимся в день судный благодати свыше, тебе с благодарением умильно вопиюще:

Радуйся, великомученице Злато, златая целомудрия палато.

Икос 1

Ангелов и всех святых небесных удивление, любовьию Христа возлюбльшая презельною и

девства чисте обручившись Тому хранением,
Злата достохвальная пребысть неоскверненною;
и вено златотканное — одежду обагренную
Небесному Обручнику с веселием вручи.
Молитвенницу теплую от Бога получивше,
девице богомудренней умильно вопием:

Радуйся, источнице небесных утешений;

Радуйся, прекрасное девства прославление.

Радуйся, Царя Христа обручнице нескверная;

Радуйся, заступнице всем любящим тя
верная.

Радуйся, кадильнице Святейшему лучистая;

Радуйся, девице благодетельная и чистая.

Радуйся, звездо, во мраке рабства
просиявшая;

Радуйся, луно златая, тьму греха разгнавшая.

Радуйся, великомученице Злато, златая
целомудрия палато.

Кондак 2

Видящи святая сатанинство неверных,
доблественно муки претерпети положи в сердце
и молитвою укрепльшися, рече: «Верую во
Христа, Тому Единому служу, Той бо есть

Жених, Егоже аз не отрекуся даже аще тмы страданий ныне претерплю». Сицевое девы богомудрыя рачение хваляще, поем Христу умильно: Аллилуиа.

Икос 2

Разума небеснаго девицы невмещающе и хотяще сквернии грехом растлiti Злату, отдаша ю женам своим, да, льстяще и вещающе, помутят сердце девы сластолюбием и златом. Обаче не смутися, ни подвижесе святая, но паче благодатию мужающихся в любви пребысть на Веры камени, поганиц посрамляющи; темже и мы златую Злату сице воспеваем:

Радуйся, Христова избраннице венчанная;
Радуйся, Болгарии печальнице всехвальная.
Радуйся, Божественная Веры славословие;
Радуйся, смирившая агарян пустословие.
Радуйся, смутившая поганцев, боголюбие;
Радуйся, любезная другине Богородицы.
Радуйся, пресладостное мучеников пение;
Радуйся, от ереси надежное хранение.

Радуйся, великомученице Злато, златая целомудрия палато.

Кондак 3

Силою прельщения сломити невозможше
Злату благонравную, зловернии призваша с
сестрами ея, отца и матери — слезами да деву
отвратят от Веры чистыя, хвалами, да никогда
возможет Богу пети: Аллилуиа.

Икос 3

Имущи дева чистую к родителем любовь
смутися обольщением и в мале не подвижесе,
обаче не возможе ухищрение врагов, и Злата
небомудренно родителей отвержесе:
«Глаголющих ми истиннаго Бога отрецися,
отныне вас не вем. Христос Отец есть мой, и
Матерь ми отныне есть Владычица Пречистая,
всех мучеников вои мне суть братия и сестры!»
Мы убо небомудрию дивимся Златы чистыя и
гласы непрестанными ей сие вопием:

Радуйся, соловей святыя Церкви богогласный;

Радуйся, сосуде девства, светлый и
прекрасный.

Радуйся, превечную весну достигший цвете;

Радуйся, нас озаривый златозарный свете.

Радуйся, блаженство воспевающих тя вечное;

Радуйся, всем чтущим ты радость
бесконечная.

Радуйся, сокровище благих и исцеления;

Радуйся, свеще пречудна верным озарения.

Радуйся, великомученице Злато, златая
целомудрия палато.

Кондак 4

Бурею к родителем не возмог пристрастия
Злату на нечестие поганское прельстити, диавол
возъярися и неверных распаляше зверское, во
еже ю нещадно бити. Плоть девицы чистыя
агаряне начаша резати и пред очима ея вешати
ю, но паче прежде к Богу возгорися Злата
пламенем любви, Христу в терпении поющи:
Аллилуиа.

Икос 4

Отцу ея духовному иерею Тимофею
прилучшуся страданий места близу, Злата к
нему посла, просящи: да молитвою своею
поможет ей течение страдальчества скончати. И,
Златою посрамлены, злодеи озверевше,
повесиша на древе непорочную девицу и резаху
ю, дондеже от плоти разрешися. Она же ныне
духом слышит поющия ю сице:

Радуйся, златая Македонии девице;
Радуйся, крилома нас хранящая орлице.
Радуйся, супружества честного ограждение;
Радуйся, монашества златое украшение.
Радуйся, всем верным благоверная княгине;
Радуйся, всем девствующим верная другине.
Радуйся, святая Веры лиро златогласная;
Радуйся, деннице целомудрием прекрасная.
Радуйся, великомученице Злато, златая
целомудрия палато.

Кондак 5

Боготечную звезду сию, нам верно
озарившую тесный путь спасения в растленном
веще сем, Злату, чашу горькую до дна
выпившую хваляще немолчно, Богу вопием:
Аллилуиа.

Икос 5

Видев дочери лютыя духовныя страдания,
Тимофей святому Никодиму вся поведает;
Никодим же славный благочестным в назидаение
всезлатая Златы написа победу. Мощи
всечестныя девы взявше, благовернии со

благословением и пеньми погребоша, с чистым
фимиамом к небесем каждением пение
всечудней сицевое вознесоша:

Радуйся, садов небесных ластовице белая;

Радуйся, поправшая врага девице смелая.

Радуйся, нам диавола безсилие явившая;

Радуйся, всем силу целомудрия открывшая.

Радуйся, духовное млеко нам источающая;

Радуйся, языков новых нравы обличающая.

Радуйся, всем любящим тя радости спасения;

Радуйся, от скверны мира верным
сохранение.

Радуйся, великомученице Злато, златая
целомудрия палато.

Кондак 6

Проповедь Евангелия в веце ересей присно
ухищряется людей поработитель упразднити
лжею в умножении страстей, яко да никтоже
воспоет Спасителю: Аллилуиа.

Икос 6

Воссиявши в мраце долгих лет порабощения,
Злата златолучное нам солнце показася, имже

тьма разгнася агарянского прельщения, тепле озаряюще страждущий наш род. Днесь султан духовный вновь обаче воцарися, люди обольщая Православия предательми; проповедь Евангелия паки мрак объят, темже со слезами от нощи зываем Злате:

Радуйся, прельщенных к свету Истины воззвание;

Радуйся, всех кающихся твердое возстание.

Радуйся, иконо всезлатая Православия;

Радуйся, бесов нечистых славное прогнание.

Радуйся, родов славянских грозде чист и сладок;

Радуйся, поточе златоструен и пресладок.

Радуйся, девице, голубицы чистшая;

Радуйся, реко, струями Церковь позлатившая.

Радуйся, великомученице Злато, златая целомудрия палато.

Кондак 7

Хотящия от нынешняго века заблуждений и многих ересей ко свету Истины преити, девице чистонравная, избави от тимения, да вкупе

водворимся в храм пресветлый чистоты, поюще
Свободившаго навеки нас от тли: Аллилуиа.

Икос 7

Новую ты всех Царя невесту ублажаем, чтуще
ты усердную молитвенницу Злато, яко в ниве
рабства клас прозябший златостеблен,
напоенней кровию неведомых страдальцев, с
нимиже о нас молися, славная девице, поющих
тебе сице:

Радуйся, воистинну рабо Господня верная;

Радуйся, Христа невесто чистая, нескверная.

Радуйся, прекрасный крине нивы
целомудрия;

Радуйся, пресладкий соте луга богомудрия.

Радуйся, любви зеркало небоорошенное;

Радуйся, Святаго Духа озеро блаженное.

Радуйся, златое добродетелей сияние;

Радуйся, прекрасное Зиждителя ваяние.

Радуйся, великомученице Злато, златая
целомудрия палато.

Кондак 8

Странное и дивное явила есть терпение Злата
страстотерпица, Болгарии покров — та бо нам
явился дний последних утешение, место
сокровения от злобы всех врагов. Темже
велегласное о ней возносим пение к Богу:
Аллилуиа.

Икос 8

Вся Церковь Православная днесь светло
торжествует, в превыспренних всех Ангелов
славление звучит и вкупе земнороднии с
небесными ликуют — вся Златы память светлую
земная тварь творит. Все в мраце утомлении,
грядите, почерпите прощение грехов от вод
источника пречистаго, и все обремененнии
печальми приидите, да солнцу Православия
лучистому поем:

Радуйся, Едема голубице белоснежная;

Радуйся, любви Христовы высоте безбрежная.

Радуйся, село, плодами щедрое и тучное;

Радуйся, раздравый мрака кресте
златолучный.

Радуйся, избраннице Царя веков прекрасная;

Радуйся, Святыя Веры гусле dobroгласная.

Радуйся, безблазнства изящный аметисте;

Радуйся, кристале богорядия пречистый.

Радуйся, великомученице Злато, златая
целомудрия палато.

Кондак 9

Всякое дыхание и Ангелов сословие зряще тя,
дивляхуся, понеже юна сущи познала еси тайны
несказанно Богословия, возмогши пред лицом
врагов воспети Присносущному: Аллилуиа.

Икос 9

Витийскаго искусства невладеючи, святая
агарян безсловесие премудро обличи, и девства
сохранение на Бога возлагаючи, блаженство
несказанное навеки улучи, егоже и мы,
грешнии, молитвами ея сподобитися чаем и
Злату воспеваем:

Радуйся, покрове проповедником Евангелия;

Радуйся, обителем святым пречудный Ангеле.

Радуйся, смиренным богословом поспешение;

Радуйся, ветий лицеприятных обличение.

Радуйся, времен последних ясное светило;

Радуйся, душ верных кораблей кормило.
Радуйся, Святыя Церкви луче небопарный;
Радуйся, смирившая вся козни всековарных.
Радуйся, великомученице Злато, златая
целомудрия палато.

Кондак 10

Спаستися всем хотящим есть
предстательница дивная молитвенница крепкая
о всех смиренных Злата, в страданиях всем
сущым утешение премирное, и на Суде —
поющих ю покров и благодать, еяже ради Бога
велегласно величаем: Аллилуиа.

Икос 10

Стена еси хранящимся от мира адотечного и
любящим тя тепле от падений сохранение —
молитвами твоими избавляй от муки вечныя вся
лики православных тя, мученице, чтущая,
венцы тебе словесныя прославленной плетуция:

Радуйся, в океане бед нам остров
неприступный;

Радуйся, заступнице, в молитвах
неотступная.

Радуйся, нам в мире любодейнем твердь
пречистая;

Радуйся, прощения грехов купель лучистая.

Радуйся, душам болящим былие целебное;

Радуйся, сердечным язвам тишино
врачебная.

Радуйся, монахом чистым аммо благосердая;

Радуйся, живущим в мире помощи усердная.

Радуйся, великомученице Злато, златая
целомудрия палато.

Кондак 11

Пением восхвалити Тя, всех Владыко,
тщась словеса подаждь — к милостем Твоим
сладостно спростреться, и Тебе молящимся
даруй благодать, да благодарно воззовем:
Аллилуиа.

Икос 11

Свещу златосияйну в мраце рабскаго
страдания, зрим Злату, наставляющую к свету
всех спасения: та образ нам явися добродетелей
Писания любви от нихже Божия венец есть всех
велений. Венчания сего и мы сподобитися

чающе, грядите, поклонимся Злате, сице
воспевающе:

Радуйся, любви неизглаголанная море;

Радуйся, церковей всех умирение раздора.

Радуйся, пещеро от напастей сокровенная;

Радуйся, алкательнице правды насыщенная.

Радуйся, божественного алавастр ухания;

Радуйся, золотая ветвь Богопочитания.

Радуйся, Болгарии святая дщи нескверная;

Радуйся, ты чтущим воеводу благоверная.

Радуйся, великомученице Злато, золотая
целомудрия палата.

Кондак 12

Благодати чудное яви нам во страдании
Злата венцеславимая, да и мы имеем твердое на
Бога еже в скорбех упование, зверства
небоящего имущаго явиться сына беззакония,
всех в мире обольстити. Молитвами ея же нас
избави от злодея Боже милосерде, да поем Ти
присно: Аллилуиа.

Икос 12

Поюще ты девице и мученице славная, о всех
в недужех сущих и во обстояниих сугубое
приносим ти и слезное моление:

Радуйся, труждающимся помощи обильная;

Радуйся, печальных утешение пресладкое.

Радуйся, обидимых защитнице всесильная;

Радуйся, уязвленных целительнице кроткая.

Радуйся, всем плачущим заступнице благая;

Радуйся, отчаянным советнице златая.

Радуйся, от мрака мира в светлость нам
вселение;

Радуйся, в чертог небесный верных
водворение.

Радуйся, о нас всегрешных Бога умоление;

Радуйся, страстями растленных дивно
удобрение.

Радуйся, девице всезлатая и прекрасная;

Радуйся, Церкви Православныя птице
богогласная.

Радуйся, великомученице Злато, златая
целомудрия палато.

Кондак 13

О, Злато досточудная, Болгарии хваление!
Приимши благосердно ныне любящих тя пение,
от всяких нас напастей и грехом порабощения
молитвами твоими благосердными спаси, во еже
нам сподобиться и на небеси с тобою
непрестанно Христа Бога величати: Аллилуиа.

Этот кондак читается трижды, затем кондак
1-й и икос 1-й.

Молитва

О, преславное прозябение рода Болгарского,
солнцезрачная девице, багряницею кровей
своих украшенная, предобрая мати наша,
великомученице Злато! Услыши чад твоих с
любовию к тебе ныне прибегающих и малое сие
моление наше приими, и Господу Богу нашему
благоприятно сотвори. Согрешихом бо и
беззаконновахом, и недостойны есмы зрети
высоту небесную от множества неправд наших
— связани есмы узами греховными и николиже
воли Создателя нашего сотворихом, ниже
сохранихом повелений Его; темже преклоняем
колена сокрушенна и смиренна сердца нашего
ко Творцу и Спасу своему и твоего матерняго
заступления к Нему просим. Воздвигни руце

твои, красная девице, любви Христовы
сосуде всезлатый, и вкупе с Пречистою
Богородицею и всеми святыми рода нашего
Зиждителя всех умоли, да ниспослет милость
Свою на многострадальную страну нашу,
шатание людей да умирит, горькия соблазны
церковныя да утолит, отступившия от Веры
Православныя светом Истины Своея да
просветит, старыя да умудрит, юныя да
наставит, от растления нравов и от сетей
еретических добре их сохраняя, младенцы
млеко благочестия да воспитает, всех же нас
банею покаяния да обновит. Умоли, о
златонравная мати, красный цвете девства и
мучеников удобрение, Господа и Спаса нашего,
да подаст нам дух смирения и кротости, дух
целомудрия и послушания, дух любви
нелицемерныя, и да управит ум наш, и сердце
наше в правой вере да укрепит, яко да Истиною
наставляеми и любовью осияваеми, тихое и
мирное zde проживем житие во всяком
благочестии и чистоте. Молися, о
великомученице славная, сладчайшая мати
наша Злато, Троице Преподобней, да
избавит ны от всякаго обстояния, и от всякаго
навета вражия безбоязненны нас да сохранит,

да ни ранами, ниже прещением устрашаеми, до конца верни Христу Жениху нашему пребудем, и тако со благою надеждею и истинным уверением к тамошнему миру пойдем, богоприятное твое заступление призывающе и Пребожественную Троицу: Отца и Сына и Святаго Духа, выну хваляще и благословяще, ныне и присно, и во веки веков, аминь.

